

## Arrantzalea nuen senarra

### I

Urriak hogei, ilunabarrez  
gaua jantzi zen ilun nabarrez  
itsas zabala kanposantu lez  
ta Mutriku luto beltzez (bis)  
“Gazte alaiak” izenez  
arrantzontzia indarrez  
itsasoratu zen goizez  
baina enbatak irentsi zuen  
gerora halabeharrez...  
Itsasontzia aurkitu zuten  
baina nire senarra ez. (bis)



ALBERTO ELOSEGI / XDZ

### II

Muxu suhar bat kaian barrena,  
irri bat ahalik ta zabalena,  
“bidaia on ta zorte on, maite”  
zen esan nion azkena. (bis)  
Orduko oroitzapena  
ta oraingo etsipena...  
Amildegia da dena.  
Aspaldi galdu dut bizipoza,  
aspaldi itxaropena  
betiko agur bihurtu baita  
ustez gero arte zena. (bis)

### III

Zenbat helburu eta promesa,  
langintza gogor eta nekeza.  
Ilusio ta amets gozoen  
urkatzaile da ur geza. (bis)  
Itsasontziaren ertza  
suntsitzeko interesa  
mendekatu ahal baneza...  
Biak batera zapuztu ditu  
(samurra denik ez pentsa):  
ametsetako itsas zabala  
ta itsasoko ametsa. (bis)

### IV

Arrantzalea nuen senarra  
langile fina ta goiztiarra,  
famiaren ongizatea  
zuen amets bakarra. (bis)  
Itsasoaren indarra  
hango bitsa ta aparra...  
Orain dena zoritxarra!  
Zein gogorra zen begietatik  
ezin sahietsiz nigarra  
berriz ez zela porturatuko  
umeci esan beharra. (bis)

### V

Iraganaren min ta destaina!  
Alargun gaude ni ta oraina.  
Dena eskaini zigunak dena  
kendu zigun, alajaina! (bis)  
Olatutzarren tamaina  
bera irensteko aina  
izan zen behin, alabaina  
oskarbi bada maiz zeruaren  
ispilu da itsas gaina:  
Han dagoela iruditzen zait  
ez dut sinistu nahi baina. (bis)

### VI

Noiz itzuliko digun aiduru,  
itsas zabala begiz jo dugu  
baina olatuak dira erantzun;  
Joakin beretzat hartu du. (bis)  
Nahiz ta egunak ilundu,  
portutik ezin urrundu,  
min sarkor hau nork leundu?  
Joakin maitea, nahiz desagertu  
orain bi aste inguru,  
azalduko den itxaropenak  
biziarazten gaitu gu. (bis)

**DOINUA:** Itsaso hori dago zatarra / Naufragoarena.

Goierriko Bertso Eskolak Ordiziako Udalarekin batera antolatutako  
XVII. Lazkao Txiki Sariko bertso sorta irabazlea.